



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL**

***Komunikadu Imprensa
22 Maiu 2013***

JSMP realiza treinamentu kona-ba demokrasia no papel orgaun soberanu sira nian iha Ostico, Vemasse, Distritu Baukau

Unidade Programa Observasaun Parlamentár (POP)-JSMP hala'ó treinamentu ba comunidade iha Suku Ostico, Sub -Distritu Vemasse, Distritu Baukau iha 16 Maiu 2013. Treinamentu ne'e kobre asuntu importante rua kona-ba demokrasia no knaar orgaun soberanu sira nian.

Partisipante sira kompostu hosi feto na'in 11 no mane na'in 18 ne'ebé partisipa husi xefi suku no estrutura suku, representante OPMT, representante joventude feto no mane, agrikultór no mestre inklui representante média lokál.

“Treinamentu ne'e importante tebes atu bele informa no hasa'e koñesimentu comunidade sira nian, liu-liu halakon konfuzsaun ne'ebé eziste iha comunidade kona-ba knaar órgaun soberanu sira idak-idak nian”, dehan Diretór Ezekutivu JSMP Luis de Oliveira Sampaio.

Xefe suku Ostico, Afonso Freitas komenta katak *“partisipante sira haksolok tebes no partisipa ativamente iha treinamentu ne'e. Partisipante balun hato'o sujestaun no halo kritika ne'ebé pozitivu tebes tanbá materia treinamentu ne'ebé JSMP fó ne'e nu'udar buat foun ne'ebé sira foin simu.”*

Xefi Suku mós agreedese tebes ba JSMP ba realizasaun treinamentu ne'e tanbá bele kapasita comunidade sira, liu-liu hasa'e sira nia koñesimentu kona-ba sistema demokrasia ne'ebé Estadu Timor Leste adopta. Tanba tuir nia katak maske ukun-an tinan 10 resin ona, ninia comunidade sira sei iha limitasaun koñesimentu kona-ba demokrasia no knaar orgaun soberanu ida-idak nian.

Tanba ne'e nia rekomenda ba JSMP atu bele iha kontinuasaun ba treinamentu ne'e iha futuru. Ne'e mós bele haforsa liu tan comunidade sira nia koñesimentu kona-ba sira nia direitu no dever iha prosesu harii Estadu Direitu Demokrátiku.

Entertantu, Diretór JSMP Luis de Oliveira Sampaio konsidera rekomendasaun Xefi Suku Ostico importante no relevante duni, tanbá comunidade barak mak sei presiza duni informasaun ne'ebé kle'an kona-ba knaar Estadu nian ba prosesu demokratizasaun iha Timor Leste.

Treinamentu ne'e hala'ó inklui distribuissau manual JSMP hamutuk 230 no hetan antusiasmu maka'as husi comunidade sira. Tuir planu treinamentu hanesan sei continua halo iha distritu Ermera.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl